

Art al gimnasi tenor il motto «galaxia»

Ensemen cun lur magister Gianin Conrad ei la tschunavla classa dil gimnasi dalla claustra da Mustér stada creativa. Il resultat ein las pli differentas lavurs, tuttas en in connex culla «galaxia». Il project ei staus singulars e duei vegnir cuntinuaus igl onn vegnent.

HANS HUONDER/FMR

Il gimnasi dalla claustra a Mustér ei bein enconuschents per sia formaziun generala profunda da giuvenils, mo era pervia dalla musica ed il cant. Ina ga ni l'otra han gimnasiastas e gimnasiasts da Mustér era fatg furore el sport, mo davart igl art ell'instrucziun han ins udiu relativamein pauc. Quei savess semidar ils proxims onns. Il scolast dalla formaziun creativa, *Gianin Conrad*, ha involviu la tschunavla classa uonn en ina lavur d'art: «Las 19 scolaras e scolars han savieu eleger sezs il tema, nus havein luvrau comunablamain vid il concept da lur ideas e la fin finala era giudicau ensemen ils products finals.» Ad el seigi ei stau clar naven dall'enschatta che buca tuts seigien fascinai ed interessai vid igl art: «Cun quella lavur hai jeu

era vuliu che las scolaras ed ils scolars sorprendien responsabladad per quei ch'els fan e lavurien sur sesez. Igl avegnir vegnan els a stuer far quei en differentes secturs dalla veta. Igl ei impurtont ch'ins sefatschenti d'in project naven dall'idea entochen la realisaziun.»

Dall'idea al concept e la realisaziun

Il motto da lur lavurs ha giu da star en in connex cuagl areal dalla scola. La proposta dallas gimnasiastas e dils gimnasiasts ei la fin finala curdada sil tema «galaxia». En teams ni en in cass era persuls han els allura luvrau rodund treis meins – secapescha sulettamein durant l'instrucziun dalla formaziun creativa – vid lur projects. Avon che far quei ei scadin project vegnius discussiunus cul magister, leutier ei vegniu scaffiu per mintgin in concept. Las lavurs finidas ein allura vegnidadas exponidas en scola durant entgens dis. «Aschia han ils scolasts e tuts conscolars saviu admirar e giudicar ellas. Ils resuns ein stai per gronda part positivs e dalla quarta classa ei gia vegniu il giavisch da medemamein saver far in

tal project igl onn da scola vegnent», di Gianin Conrad. Alla fin dil project ein las lavurs vegnidadas giudicadas dalla classa sco dil scolast. Ordlunder ei lu sedada la valetaziun finala da quellas. «Ord mia vesta eis ei era stau impurtont che la classa sefatschenti la fin finala da tuttas lavurs. Ina tala discussiun ei fetg impurtonta», puntuescha Gianin Conrad. Las lavurs ein dil reminent vegnidadas fatgas cun fetg pigns cuosts da material.

La «galaxia» ord vesta dils scolars

Las diesch lavurs savessen buca esser pli variontas e lubeschas dabia spazi d'interpretaziun. Aschia per exempel quella da *Kim Deragisch*, *Sarai Verdú* e *Silvana Wieland*. Las treis gimnasiastas han rimnau discs cum-pacts, tagliau quels en tocca e taccau quella

el cantun dalla scala ell'alzada sisum dalla scola. Essend ch'il cantun ei rodunds sedat aschia in effect tut special ed en cumbinaziun cull'illuminaziun montada seprenta la lavur ord differenta glich sequent la posiziun dil contemplader. «El center da nossa lavur stat la glich. Las reflexiuns cun differentas colurs duein porscher variaziun als conscolars e scolasts el mintgadi da scola stregn e magari lungurus», commenteschan las treis scolaras lur lavur. Ella sa vegnir interpretada sco tschiel plein steilas ni in'explosiun cun nundumbrevla tocca. In'otra lavur che regorda concretamein vid la «galaxia» ei quella da *Vica Jacomet* ed *Elli Garoes*. Ella porta il tetel «la via ensiviars». En lur concept scrivan ellas: «La via ensiviars san ins interpretar differentamein: Il viadi all'arrivada, la matura, il senn dalla veta ni era Diu. Il viadi e l'arriva-

da ein denton buca per tuts il medem, aschia sco la rotaziun da mintga planet entuorn il sulegl ei.» Effects cun glich fan quella lavur fetg attractiva.

Lavurs fetg differentas

Autras lavurs ein da tempra abstracta, ina ei denton era pil gust dil magun: Els «Space Cookies» da *Marco Broger* e *Vincent Felder*. «Quels cookies cuntegnan normalmein cannabis», scrivan ils dus scolars en lur concept. Il cannabis ei vegnius remplazzaus dad els dus cun auters mieds, adattai persunter sco per exempel tschugalata alva cun colurs da vivonda ni verduras e fretgs. Quels cookies ein allura vegni reparti dapertut en scola: «Ins sa gie buca co drogas gustan ni tgei effect ch'ellas han sin nus. U ch'ins survegn in cookie che gusta ni buca. In cun schliet gust savess lu per exempel esser per in «Bad Trip». Era ein ils loghens d'ina muntada speciala, la stanza dils scolasts per exempel per autoritad.»



«Melius Cranium» – ina lavur ch'ei vegnida exponida all'entrada dalla scola.